

SCRIPTA

Numéro Scripta : 2073

Auteur(s) : Innocent IV [pape]

Bénéficiaire(s) : Pont-de-l'Arche, Notre-Dame de Bonport (abbaye)

Genre d'acte : bulle

Authenticité : non suspect

Datation : 1245, octobre

Lieu d'émission : Lyon

Action juridique : confirmation générale

Langue du texte : latin

Analyse

Le pape Innocent IV confirme la donation des biens et des privilèges de l'abbaye de Notre-Dame de Bonport.

Tableau de la tradition

Éditions principales

a. Andrieux Jules, *Cartulaire de l'abbaye royale de Notre-Dame de Bon-Port de l'ordre de Cîteaux au diocèse d'Évreux*, Évreux, Hérissé, 1862, n° CXLVI, p. 145-150.

b. Bonnin Théodose, *Cartulaire de Louviers*, Évreux, Hérissé, 1870-1873, 6 vol., t. 1, n° CLXXIII, p. 207-211.

Texte établi d'après b

Innocencius episcopus, servus servorum Dei, dilectis filiis abbati monasterii de Bono Portu ejusque fratribus, tam presentibus quam futuris, regularem vitam professis, salutem in Domino et apostolicam benedictionem.

Religiosam vitam eligentibus apostolicum convenit adesse presidium, ne forte cujuslibet temeritatis incursus aut eos a proposito revocet, aut robur, quod absit, sacre religionis infringat. Ea propter, dilecti in Domino filii, vestris justis postulationibus clementer annuimus, et monasterium de Bono Portu, Ebroicensis diocesis, in quo divino estis obsequio mancipati, sub beati Petri et nostra protectione suscipimus, et presentis scripti privilegio communimus.

In primis siquidem statuente ut ordo monasticus qui, secundum Deum et beati Benedicti regulam atque institutionem Cisterciensium fratrum, a vobis ante concilium generale susceptam in eodem monasterio institutus esse dinoscitur, perpetuis ibidem temporibus inviolabiliter observetur.

Preterea quascumque possessiones, quecumque bona idem monasterium impresentiarum juste ac canonice possidetis, aut in futurum, concessione pontificum, largitione regum vel principum, oblatione fidelium, seu aliis justis modis, prestante Domino, poteritis adipisci firma vobis vestrisque successoribus et illibata permaneant.

In quibus hec propriis duximus exprimenda vocabulis : Locum ipsum in quo prefatum monasterium situm est, cum omnibus pertinentiis suis ; decimas de Crikebuef, de Santolio et de Vallibus ; granchiam de Maresdans, cum omnibus pertinentiis suis, molendinum de Poses, cum omnibus pertinentiis suis ; domos et possessiones quas habetis in civitate Rothomagi ; domos et possessiones quas habetis in haia de Vedano ; clausum de Lerie, cum omnibus pertinentiis suis ; vineas quas habetis in Dol, Houmechon, Sancto Gratiano, Blesmu, Bougival, Gavereio et in Vallibus, cum omnibus pertinentiis earumdem ; annum redditum centum marcarum argenti in villa que dicitur Dieppa ; viginti carrucas terre, usum lignorum et pascua in foresta de Bord ; decem carrucas terre, usum lignorum et pascua in foresta de Eauvitz ; jus in aqua Secane a Ponte Arche usque ad falesiam de Mueis, cum redditibus et piscationibus suis ; prata Vallis Rodolii, Loci Veris, Vicarville, Hume et Lire, cum omnibus pertinentiis suis ; molendinum de Landemare, cum omnibus pertinentiis suis, cum pratis, vineis, terris, nemoribus,

usagiis et pascuis, in bosco et plano, in aquis et molendinis, in viis et semitis, et omnibus aliis libertatibus et immutationibus suis.

Sane laborum de possessionibus habitis ante concilium generale ac eciam novalium que propriis manibus aut sumptibus colitis, de quibus aliquis hactenus non percepit, sive de hortis et virgultis et piscationibus vestris, vel de nutrimentis animalium vestrorum, nullus a vobis decimas exigere vel extorquere presumat.

Liceat quoque vobis clericos vel laicos liberos et absolutos e seculo fugientes ad conversionem recipere et eos absque contradictione aliqua retinere.

Prohibemus insuper ut nulli fratrum vestrorum, post factam in monasterio vestro professionem, fas [sit] sine abbatis sui licentia de eodem loco discedere ; discendentem vero absque communium litterarum vestrarum cautione nullus audeat retinere. Quod si quis forte retinere presumpserit, licitum vobis sit in ipsos monachos vel conversos regularem sententiam promulgare. Illud districtius inhibentes, ne terras seu quodlibet beneficium ecclesie vestre collatum liceat alicui personaliter dari, sive alio modo alienari, absque consensu totius capituli vel majoris vel sanioris partis ipsius. Si que vero donationes vel alienationes aliter quam dictum est facte fuerunt, eas irritas esse censemus.

Ad hec eciam prohibemus ne aliquis monachus, sive conversus, sub professione vestre domus astrictus, sine consensu et licencia abbatis et majoris partis capituli vestri pro aliquo fidejubeat, vel ab aliquo pecuniam mutuo accipiat, ultra summam capituli vestri providencia constitutam, nisi propter manifestam domus vestre utilitatem. Quod si facere forte presumpserit, non teneatur conventus pro hiis aliquatenus respondere.

Licitum preterea sit vobis in causis propriis, sive civilem sive criminalem contineant questionem, fratrum vestrorum testimoniis uti, ne pro defectu testium jus vestrum in aliquo valeat deperire.

Insuper, auctoritate apostolica inhibemus ne ullus episcopus, vel quelibet alia persona, ad sinodos vel conventus forenses vos ire vel iudicio seculari de vestra propria substantia vel possessionibus vestris subjacere compellat, nec ad domos vestras causa ordines celebrandi, causas tractandi, vel aliquos conventus publicos convocandi, venire presumat, nec regularem electionem abbatis vestri impediatur, aut de instituendo vel removendo eo qui pro tempore fuerit, contra statuta Cisterciensis ordinis se aliquatenus intromittat. Si vero episcopus, in cujus parochia domus vestra fundata est, cum humilitate ac devotione qua convenit requisitus, substitutum abbatem benedicere et alia que ad officium episcopale pertinent vobis conferre renuerit, licitum sit abbati, si tamen sacerdos fuerit, proprios novicios benedicere, et alia que ad officium suum pertinent exercere, et vobis omnino ab alio episcopo percipere que a vestro fuerint indebite denegata. Illud adicientes ut, in recipiendis professionibus que a benedictis vel benedicendis abbatibus exhibentur, ea sint episcopi forma et expressione contenti, que ab origine ordinis noscitur instituta, ut scilicet abbates ipsi, episcopo salvo, ordine suo profiteri debeant, et contra statuta ordinis sui nullam professionem facere compellantur.

Pro consecrationibus vero altarium vel ecclesiarum, sive pro oleo sancto vel quolibet ecclesiastico sacramento, nullus a vobis, sub obtentu consuetudinis, vel alio modo, quicquam audeat extorquere, sed hec omnia gratis vobis episcopus diocesanus impendat ; alioquin liceat vobis quemcumque malueritis catholicum adire antistitem, gratiam et communionem apostolice sedis habentem, qui, nostra fretus auctoritate, vobis quod postulatur impendat.

Quod si sedes diocesani episcopi forte vacaverit, interim omnia ecclesiastica sacramenta a vicinis episcopis accipere libere et absque contradictione possitis ; sic tamen ut ex hoc in posterum proprio episcopo nullum prejudicium generetur. Quia vero interdum proprii episcopi copiam non habetis, si quem episcopum Romane sedis, ut diximus, gratiam et communionem habentem et de quo plenam noticiam habeatis, per vos transire contigerit, ab eo benedictiones vasorum et vestium, consecrationes altarium, ordinationes monachorum, auctoritate apostolice sedis recipere valeatis.

Porro, si episcopi vel alii ecclesiarum rectores in monasterium vestrum vel personas inibi constitutas, suspensionis, excommunicationis, vel interdicti sententiam promulgaverint, sive eciam in mercenarios vestros, pro eo quod decimas, sicut dictum est, non persolvitis, sive aliqua occasione eorum que ab apostolica benignitate vobis indulta sunt, seu benefactores vestros, pro eo quod aliqua vobis beneficia vel obsequia ex caritate prestiterint, vel ad laborandum adjuverint in illis diebus in quibus vos laboratis et alii feriantur, eandem sententiam protulerint, ipsam tanquam contra sedis apostolice indulta prolatam decernimus irritandam. Nec littere ille firmitatem habeant, quam tacito nomine Cisterciensis ordinis et contra indulta apostolicorum privilegiorum constiterit impetrari.

Preterea cum commune interdictum terre fuerit, liceat vobis nichilominus in vestro monasterio, exclusis excommunicatis et interdictis, divina officia celebrare.

Paci quoque et tranquillitati vestre paterna in posterum sollicitudine providere volentes, auctoritate apostolica prohibemus ut infra clausuras locorum seu grangiarumstrarum nullus rapinam seu furtum facere, ignem apponere, sanguinem fundere, hominem tenere, capere, vel interficere, seu violentiam audeat exercere.

Preterea omnes libertates et immunitates a predecessoribus nostris Romanis pontificibus ordini vestro concessas, nec non libertates et exemptiones secularium exactionum a regibus et principibus vel aliis fidelibus rationabiliter vobis indultas, auctoritate apostolica confirmamus, et presentis scripti privilegio communimus.

Decernimus ergo ut nulli omnino hominum liceat prefatum monasterium temere perturbare, aut ejus possessiones auferre, vel abbates retinere, minuere seu quibuslibet vexationibus fatigare, sed omnia integra conserventur eorum pro quorum gubernatione aut sustentatione concessa sunt usibus omnimodis profutura, salva sedis apostolice auctoritate, et in predictis decimis moderatione concilii generalis.

Si qua igitur in futurum ecclesiastica secularisve persona hanc nostre constitutionis paginam, sciens, contra eam temere venire temptaverit, secundo tertiove commonita, nisi reatum suum congrua satisfactione correxerit, potestatis honorisque sui careat dignitate reamque se divino iudicio existere de perpetrata iniquitate cognoscat, et a sacratissimo corpore ac sanguine Dei et Domini Redemptoris nostri Jhesu Christi aliena fiat, atque in extremo examine districte subjaceat ultioni. Cunctis autem eidem loco sua jura servantibus sit pax Domini nostri Jhesu Christi, quatinus et hic fructum bone actionis percipiant, et apud districtum iudicem premia eterne pacis inveniant. Amen, amen, amen.

[S] Petrus, [S] Paulus. Innocentius papa quartus.

Notas fac mihi, Domine, vias vite.

Ego Innocentius, catholice ecclesie episcopus. I.N.

† Ego Petrus, tituli Sancti Marcelli, presbiter cardinalis, subscripsi.

† Ego Willelmus, basilice Duodecim Apostolorum, presbiter cardinalis, ss.

† Ego Franciscus Johannes, tituli Sancti Laurentii in lucina, presbiter cardinalis, ss.

† Ego Egidius Sanctorum Cosme et Damiani, diaconus cardinalis, ss.

† Ego Octavianus, beate Marie in via lata, diaconus cardinalis, ss.

† Ego Petrus, Sancti Georgii ad velum aureum, diaconus cardinalis, ss.

† Ego Johannes, Sancti Nicholai in curia Tulliana, diaconus cardinalis, ss.

† Ego Willelmus, Sancti Eustachii, diaconus cardinalis, ss.

† Ego Oto Portuensis et Sancte Rufine episcopus, ss.

† Ego Willelmus Sabinensis episcopus, ss.

Datum Lugduni, per manum magistri Marini, dicte Romane ecclesie vice-cancellarii, I. idus octobris, indictione iiij. incarnationis Dominice anno MCCXLV, pontificatus vero domini Innocentii pape quarti anno tertio.